

Masyarakat terima baik rombakan Kabinet

PULAU PINANG, Jumaat — Rombakan Kabinet yang diumumkan oleh Perdana Menteri Datuk Seri Dr Mahathir Mohamad semalam diterima baik oleh masyarakat di sini.

Mereka mensifatkan rombakan kecil itu mencerminkan sikap kesederhanaan pucuk pimpinan di samping berusaha memantapkan lagi muka-muka baru dalam jemaah menteri.

Mereka juga berkata, Datuk Seri Dr Mahathir telah mendorongkan pemimpin-pemimpin muda untuk turut memikul tanggungjawab mengendalikan negara.

"Kami mengalu-alukan Kabinet baru itu," kata Ketua Pergerakan Pemuda Umno Negeri Pulau Pinang, Encik Zain Haji Omar.

Encik Zain juga mengucapkan tahniah kepada pemimpin muda yang diberi tempat dan tanggungjawab penting.

"Kami yakin penuh di atas pemilihan tepat yang dibuat oleh Datuk Seri Dr Mahathir semalam," ujarnya.

Encik Zain mewakili ahli-ahli Pergerakan Pemuda Umno Pulau Pinang mengucapkan tahniah kepada Encik Anwar Ibrahim yang dilantik sebagai Menteri Kebudayaan, Belia dan Sukan dan Datuk Shahrir Abdul Samad, Menteri Wilayah Persekutuan.

Katanya, Pergerakan Pemuda akan memberi kerjasama penuh kepada menteri yang baru itu.

Lantikan menteri baru dari Pulau Pinang telah meninggikan lagi imej Umno negeri ini.

Sementara itu, Setiausaha Biro Penerangan Pergerakan Pemuda Umno Bahagian Kulim Bandar Baharu, Encik Anuar Ahmad berkata, "Kami mengalu-alukan lantikan ketua Umno bahagian itu, Encik Abdul Kadir Sheikh Fadzir selaku Timbalan Menteri Hal-Ehwal Luar Negeri."

"Kami juga merasa bangga atas lantikan Encik Anwar Ibrahim selaku menteri penuh," katanya.

Encik Anuar berkata, "Kami berharap menteri muda itu dapat memberi khidmat yang cemerlang berlandaskan kepemimpinan melalui teladan."